



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 849, Datë 03.12.2021

“MBI AUTORIZIMIN E PËRQENDRIMIT TË REALIZUAR NËPËRMJET KRIJIMIT TË NJË NDËRMARRJE TË PËRBASHKËT ME FUNKSIONE TË PLOTA, NGA SHOQËRIA SKY UK LIMITED DHE SHOQËRIA PARAMOUNT PICTURES INTERNATIONAL LIMITED”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Znj. Rezana KONOMI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 03.12.2021, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një ndërmarrje të përbashkët me funksione të plota, nga shoqëria Sky UK Limited dhe shoqëria Paramount Pictures International Limited

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet krijimit të një ndërmarrje të përbashkët me funksione të plota, nga shoqëria Sky UK Limited dhe shoqëria Paramount Pictures International Limited.

VËREN SE:

Transaksioni dhe procedura

Pranë Autoritetit të Konkurrencës, është depozituar njoftimi mbi krijimin e një ndërmarrje të përbashkët me funksione të plota, nga shoqëritë Sky UK Limited dhe Paramount Pictures International Limited.

Referuar dokumentit “Marrëveshje investimi për sipërmarrje të përbashkët”, e lidhur më datë 16 gusht 2021, palët në marrëveshje janë:

Pala 1: Sky UK Limited është një shoqëri e themeluar në Angli dhe Uells, me objekt aktiviteti: kompani transmetuese dhe telekomunikacioni britanike që ofron shërbime televizive dhe internet me brez të gjerë, shërbime të linjës fikse dhe të telefonisë celulare për konsumatorët dhe bizneset në Mbretërinë e Bashkuar.

Sky UK Limited zotërohet tërësisht nga Comcast Corporation, e cila është një shoqëri publike amerikane, një media globale, kompani teknologjike dhe argëtuese. Comcast operon përmes tre bizneseve të saj: (i) Comcast Cable, (ii) NBCUniversal dhe (iii) Sky.

Sky UK Limited nuk është aktive në Shqipëri, por realizon të ardhura minimale nëpërmjet veprimtarisë së shitjes së produkteve dhe shpërndarjen e filmave nga NBCUniversal, një biznes i medias dhe argëtimi, aktivitetet e së cilës përfshijnë: prodhimin, shitjen dhe distribuimin e filmit dhe përmbajtjes audio-vizive nën brandet Universal Pictures, Illumination, DreamWorks Animation dhe Focus Features. Shitja e filmave të para-prodhuar realizohet kryesisht nëpërmjet platformave Netflix, Amazon, si dhe disa shitje të tjera më të vogla në Google dhe Top Chanel.

Pala 2: Paramount Pictures International Limited është një shoqëri e themeluar në Angli dhe Uells, me objekt aktiviteti: prodhim dhe shpërndarje argëtimi nëpërmjet filmave. Kompania gjithashtu ofron shpërndarje të DVD-ve dhe disqeve blu-ray për filma dhe shfaqje televizive. Paramount operon në mbarë botën.

Paramount Pictures International Limited, është pjesë e grupit të kryesuar nga shoqëria ViacomCBS Inc, e cila është një shoqëri globale amerikane e listuar në tregun e medias dhe argëtimit.

ViacomCBS ka aktivitet të kufizuar në Shqipëri nëpërmjet shitjes dhe shpërndarjes së përmbajtjes audio-vizive (AV) dhe filmit nën brandet e Paramount dhe Miramax; furnizimit me shumicë të kanaleve televizive, nën brandet Comedy Central, Nickelodeon dhe MTV.

Ndërmarrja e përbashkët JVCo është shoqëria përmes së cilës investitorët do të vendosin pronësinë e tyre të barabartë (aksionet JVCo do të jenë aksionet e Sky UK Limited dhe të Paramount Pictures International Limited), e cila do të inkorporohet nga investitorët në Angli dhe Uells sipas dispozitave të “Marrëveshjes së investimit për sipërmarrjen e përbashkët”.

Palët kanë rënë dakord të krijojnë një sipërmarrje të përbashkët ndërmjet tyre, për të nisur dhe operuar një shërbim SVOD dhe për të vënë në dispozicion kanale të caktuara lineare në territoret e sipërmarrje së përbashkët. Palët do të nënshtrohen kushteve të përcaktuara në këtë kontratë, për të përfshirë shoqërinë e re, JVCo, të inkorporohet nga investitorët në Angli dhe Uells në përputhje me dispozitat e “Marrëveshjes për sipërmarrjen e përbashkët”, datë 16 gusht 2021.

Në lidhje me transaksionet e parashikuara në Marrëveshje, palët dhe/ose anëtarë të grupeve të tyre përkatëse kanë hyrë ose do të hyjnë në procedurën e përpilimit të Marrëveshjeve të Sipërmarrjes së Përbashkët, Aktin e Themelimit, Letrat e Abonimit, Marrëveshjen e Transferimit të Aseteve, Marrëveshje Tregtare dhe çdo Marrëveshje Tjetër të lidhur në përputhje me “Marrëveshjen e investimit për sipërmarrje të përbashkët”, datë 16 gusht 2021.

Referuar dokumentacionit të depozituar, transaksioni i propozuar konsiston në krijimin e një ndërmarrje të përbashkët (joint venture) me funksione të plota nga shoqëria Sky UK Limited dhe shoqëria Paramount Pictures International Limited, duke plotësuar kriteret e neneve 10 dhe 12 të ligjit 9121/2003 ‘Për mbrojtjen e konkurrencës’, i ndryshuar.

Vlerësimi i Konkurrencës

Sipas praktikave të mëparshme në tregje të tilla, Komisioni Evropian ka identifikuar aktivitete të ndryshme në zinxhirin e shitjeve audio-vizive: 1) tregu (i sipërm) i prodhimit dhe furnizimit me përmbajtje AV (duke përfshirë furnizimin e përmbajtjeve televizive të para-prodhura dhe përmbajtje të nën-kontraktuara; 2) tregu (i ndërmjetëm) për furnizimin me shumicë të kanaleve televizive; dhe 3) tregu i (poshtëm) për furnizimin me pakicë të shërbimeve televizive për konsumatorët fundor.¹

JV nuk do të jetë aktiv në tregun e sipërm, të prodhimit dhe furnizimit me përmbajtje AV, por do të operojë vetëm në nivelet me shumicë dhe pakicë të zinxhirit të shitjeve audio-vizive.

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit, i prekur nga transaksioni, do të konsiderohet tregu i furnizimit me shumicë të kanaleve televizive dhe furnizimit me pakicë të shërbimeve televizive, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit mund të lihet i hapur. Treg përkatës gjeografik do të konsiderohet territori i Republikës së Shqipërisë.

Ndërmarrje të përbashkët, joint-venture, me funksione të plota e krijuar nga shoqëria Sky UK Limited dhe shoqëria Paramount Pictures International Limited, do të funksionojë kryesisht në nivelin e shitjes për konsumatorët, pra në nivelin e poshtëm të zinxhirit shitjeve në sektorin audio-vizive të tregut, një treg në të cilin ka natyrshëm konkurrencë të fortë dhe në rritje nga ofrues të tjerë të OTT² si Netflix dhe Amazon, të cilët transmetohen direkt te konsumatorët ose përmes platformave Multichannel Video Programming Distributor (MVPD). ViacomCBS nuk është aktiv në nivelin e shitjes për konsumatorët në Shqipëri dhe Comcast/Sky ka vetëm aktivitete minimale në Shqipëri. Prandaj, transaksioni i propozuar nuk krijon ndonjë treg të prekur në nivelin e shitjes për konsumatorët.

Ndërmarrje të përbashkët (JV) do të jetë aktive gjithashtu edhe në nivelin e ndërmjetëm të zinxhirit të shitjeve për sektorin audio-viziv, përmes shpërndarjes me shumicë, përfshirë dhe Shqipërinë. Prandaj, kjo konsiderohet si një mbivendosje horizontale edhe pse kanalet televizive do të mbeten të kontrolluara nga Partnerët dhe JV do të veprojnë vetëm si një ndërmjetësues për shitje në lidhje me to. Pjesa e tregut në fjalë është më pak se 15%, si rrjedhojë nuk do të ketë tregje të prekura horizontalisht në nivelin e shitjes me shumicë.

Lidhur me marrëdhëniet vertikale, secili nga Partnerët në JV është aktiv në tregun e sipërm për licensimin e përmbajtjes audio-vizive dhe në furnizimin me shumicë të kanaleve TV, ndërsa JV do të jetë aktiv në tregun e poshtëm, për blerjen dhe për furnizimin me pakicë të përmbajtjes audio-

¹Burimi: Vendimi i Komisionit Evropian të Konkurrencës, datë 7 prill 2017 për Rastin M.8354 Fox/Sky.

² OTT= Over the top (shpërndarja e përmbajtjeve bëhet nëpërmjet internetit)

vizive.

Përqendrimi nuk do të krijojë mbivendosje të tregjeve ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët me funksione të plota, nga shoqëria Sky UK Limited dhe shoqëria Paramount Pictures International Limited
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS